

■ COLUMNA

A la maisa

DA GISULA TSCHARNER

La dumengia alva è passa-da. Ils restorants san trair flad puspè, sunter il stress (ed il bun gudogn, speranza) da las numerusas emprimas communiuns, e dals confirmaziuns avant Pasca.

In pau trista sun jau stada blers onns, cur che mes agens uffants eran en la vegliadetgna, cun la quala buobs e mattatschas catolics dastgavan ir vi da la maisa en baselgia e prender la tschavera sontga cun tut ils auters creschids e mez creschids. E tar nus reformads stuev'ins spetgar cun quai enfin 15 u 16 onns – quella vegliadetgna che difficiltescha plitgusch in'experience positiva da la maisa sontga. Cler, dapi blers onns datti qua e tscha servetschs divins nua ch'ils uffants san participar en x ina furma dad ina sontga tschaina speziala. Però l'atmosfera rigida da las 4 dumengias autas cun il vin ed il paun ch'ils creschids (confirmads) prendan, senza brajada che savess magari disturbar cun rir u discurren u schizunt cun moviments, quella n'è betg anc svanida ord las baselgias da vischanca.

Cunbain che l'exclusiun dals uffants dal ritual da communiun nun è fitg veglia (pir dapi la reforma-



ziun), datti anc adina ina reserva profunda cunter il viver questa tschavera centrala cun fiu e flomma, ensemen cun gronds e pitschens, cun appetit ed intensità. A propo: En ils temps da medieval survegnivan schizunt ils pops lur toc paun bugnà en vin, en la cuminanza eucaristica.

Ils auters nun èn megliers, quai vul dir: Ils catolics integreschan bain ils scolars da l'emprima u segunda classa cumplainamain en messa ed eucaristia, ma persunter na dastgan els betg far quai ensemen cun reformads u cristians nuncatolics (Speranza fani tuttina, illegalmain). Exact: In pèr signurs, manegiond da savoir cumandar il crair catolic, teman che la chapientscha eucaristica da lur muvel vegnia disturbada u tissentada da la chapientscha reformada da la medema chaussa (la bibla è mo ina).

Giuditgar, sch'in carstgaun prenda ses paun e vin cun patratgs cartents e da moda digna u betg, quai sa segirain mo Dieu sez; quai na san carstgauns mai giuditgar, ni masculins ni feminins, ni en celibat, ni en matrimoni. Er betg in dogma. Il dogma è in construct istoric ed intellectual che n'ha nagut da far cun cardientscha persunala.

Forsa entschaiva l'invista profunda en la tschavera sontga gia cun mangiar ensemen mintgadi? A la maisa, nua ch'ins partga quai ch'ins ha, paun, risotto, tgarn, salata, in fritg, vin, cocacola, tiramisù... sch'ins ha insumma. E sch'ins nun ha tut quai, savainsa anc adina parter il mez toc paun ed il magiel aua. Parter ils patratgs ed ils sentiments vid la maisa, ils eveniments dal di, las temas, las curaschas, ils sbagls, ils plaischairs.

Ina maisa sontga savais Vus far en Vossa abitaziun, en l'ustria u giu pe sco picnic, cun auters ensemen. Sche Vus stidais durant la televisiun ed il radio, lura vai blier meglier, sa chapescha. Nua che dus u trais umans fan cuminanza positiva, respectond in l'auter sco misteri, regal, amia, là viva il spiert da Dieu cun els. Cun u senza dogma. Sunter u avant d'esser confirmà.